

INUIT ATAQATIGIIT

Inatsisartuni



UKA 2018/192
09.10.2018
Aqqaluaq B. Egede

**Uunga siunnersuut: Kommunit Namminersorlutillu Oqartussat
Missingersuutaat naatsorsuutaallu pillugit Inatsisartut inatsisaata
allangortinneqarnissaa pillugu Inatsisartut inatsisaat nr. xx,xx.xxx 2018-
imeersoq.**

(Aningaasaqarnermut Naalakkersuisoq)

Kommunit aammalu Namminersorlutik Oqartussat missinersuutaasa naatsorsuutaasalu siunissami pisussanut naleqqussarniarneqarnerisa kingorna, inatsisip naleqqussaqqinneqarneratut oqaatigineqarsinnaasumik suliaasaq una Naalakkersuisuniit saqqummiunneqarpoq. 2016-imi Inatsisartut inatsisaata atuutilernerata kingorna misilittagarineqalersut tunngavigalugit inatsisissaq naleqqussarniarneqartoq Inuit Ataqatigiinniit isummersorfigissavarput.

Inatsisartut 2017-imi akuerisaat naapertorlugu mittarfissat sanaartorneqarnissaannut aningaasalersorneqarnissaannullu aamma siunissami aatsitassarsiornikkut aningaasaliissuteqarnissamut oqaasertat Naalakkersuisuniit itisileriffiqineqarnissaat kissaatigaarput. Aatsitassanut aatsitassarsiornianullu aningaasaliissuteqarnissamik oqaasertat imarisaat suuppat?

Mittarfissanut tunngatillugu kommunit aammalu Namminersorlutik Oqartussat missingersuutaasa naatsorsuutaasalu inatsisiliunneqarnerisigut massakkut malitseqaataasumik naleqqussaanerup sunniutissai pillugit Naalakkersuisut erseqqilluinnartumik nassuiaatigissagaat Inuit Ataqatigiinniit kissaatigaarput.

Erseqqissaqqunaqaaq nunatta karsiata attartorsinnaanera qaffassariarlugu kommunit nammaqataalernerisigut, attartornissamillu missingersuutit kaaviaartitaasa annertunerulersinnerisigut tamanna qulakkeerneqarsimanersoq. Neriuppugut Naalakkersuisup tamanna akisinnaassagaa. Qulakkeerneqartariaqarmammi aningaasarpassuarnik attartoreernerup kingorna aningaasarsiornikkut ajalusoqqittoqassagaluarpas aamma kommunit tamatumani missingersuutimikkut eqqorneqaatigissaneraat.

Pisortat allaffissornikkut ataatsimoorussamik IT-mut aqqissuusaanermik, kommunit aamma Namminersorlutik Oqartussat ataatsimoorlutik pisiniarnermik ingerlatsisinnaalernissaat anguniarneqarpoq. Naalakkersuisulli Inuit Ataqatigiinniit

kaammattorumavagut pisiniartarnermut kiffartuussinikkullu isumaqatigiissusiortarnermut aningaasaliissutit tamaasa nutaamik nalilersuiffigineqarnissaat nalilersoqqissagaat.

Pisiniartarnermut neqerooruteqartarnermullu kaajallaasitaq aningaasarpassuarnik ingerlatsiviummat, taamaattussaannartullu isigineqalersimasutut immat nutarteriffigalugu aningaasat ilaasa siunertanut allanut sammitinneqalersinnaanerat Naalackersuisuniit ujartuiffigeqqarput.

Inatsimmi §-it assigiinngitsut peqqissaarussamik Inatsisartut Ataatsimiititaliaani sammeneqarnissaat innersuussutigissavavut.

§1. immikkoortui tamakkerlugit Inatsisartut ataatsimiititaliaanni susassaqtuni qulaajaaffigineqarnissaat innersuuppagut. Ilaatigut siunissami inuussutissarsiutit inerisarniarneqartut aamma inuussutissarsiorfiit pioreersut aningaasarpassuarnik kaaviaartitsinerisa kingorna akileraarutaasa nutaamik periuseqarluni ilusilersuiffigineqarmata.

Namminersorlutik Oqartussat pigisaannik 50 mio.kr.-nit sinnerlugit nalilinnik tunisaqarnermit iluanaarutit aamma aningaasaateqarfimmut akiliutitut nuunneqartarnissaat pineqarpoq. Tamanna nunatsinni nunaqarfiit illoqarfiillu isorliunerusutut taasinnaasatta ullumikkut sanaartornikkut ineriartortinnissaanut akissaqanngereerluta suli tatisimaneqarnerulernissatsinnut appakaannertut taaneqarsinnaanersoq qulaajarneqartariaqarpoq.

§ 23 imm. 1 pillugu kommunit pinngitsooraatik kommunit tusarniarneqarnissaat kissaatigaarput, aamma siunissami missingersuusiortarnerup qeratanerulinginnissaa tamatumani qulakkeerumagatsigu. Kommunit missingersuutaasa inuiaqatigiinnut nuatsinni toqqaanarnerpaamik sunnuteqartuunerat immiini mianersorluta sulinissatsinnik pisussaaffiliivoq.

Taamatut naatsumik oqaaseqarluta Inuit Ataqatigiinniit siunnersuut Inatsisartut ataatsimiititaliaani susassaqtumi suliassanngorlugu ingerlatinneqarnissaa inassutigaarput.